

百

末

詞

百末詞

卷三

長洲尤侗

中調

臨江仙

迎春

昨夜餞冬三寸雪
曉光俄報春回綠
楊青草勝紅梅東

風齊着力送入我門來

二句皆詞名

簫鼓綵毬迎去也
遊人

蟻走長街珠簾影裏笑
金釵老姬馱瘦馬兒戲
唱低脾

遣興

二首

搔首問天天不語
光陰無計消磨挑燈看劍
自摩挲澆

胸冷熱酒拍手短長歌 遮莫英雄老去也山林經濟
如何平章重事到煙波饒吹傳玉鴨水戰教金鷺玉鴨蛙名
少日驅車兼躍馬錦裘風雪行邊十年回首鬢蕭然蹇
驢花下路短笠渡頭船 憑寄壯心歌舞地綠樽翠袖
紅絃不然散髮事金仙蒲團香影裏橫梁自參禪

舊內

六代青山依舊在霸圖吹斷西風行人駐馬問離宮遊
船建業水蕭寺景陽鐘 百戰精靈應未散周郎獨步
江東旌旗夜擁紫髯翁漫追亡國恨又見孝陵松

舊院

十四樓前歌舞地珠簾回障神仙月明花底弄絃絃無
雙桃葉曲最小莫愁年 戰鼓催殘金粉盡空尋墜馬
遺絀香銷南國憶嬋娟東風芳草綠裙帶我猶憐

題汪蛟門錦瑟圖

二十四橋佳麗地硯齋十二平分

汪有十二硯齋以江
夢中所得名之江

郎夢筆助奇文情深聊爾爾才妙漫云云 二十五絃
彈夜月花間錦瑟橫陳春風鬢影看文君一窗三婦艷
誰雨復誰雲

壽查伊璜 又一體

絲竹東山自有煙花南部偏多紅兒起舞雪兒歌人生

行樂耳但日飲亡何 事業暗鳴叱咤文章者也之乎
不如老子興婆娑珠囊披毳衲玉笛臥漁簑

蝶戀花

悲秋

秋氣悲哉秋景肅引出秋聲夜到西窗哭聚族新憂無
計逐躊躇獨去逃深屋 楓自飄紅榆自綠蟋蟀莎鷄
爭唱涼風曲雁陣驚寒音斷續披衣起寫相思牘

書悶

雨雨風風飄曲仇點點丁丁滴碎柔腸斷聽說闌珊春
又半無端惹起傷春怨 料悄輕寒猶拂而况是啼鳩

日向愁人喚司馬青衫紅淚濺倚闌惆悵暮申伴

弔逆生香

彤管不隨春夢度留與人間啼哭相思句一本青編紅
淚註離魂縮入香奩住 髣髴真真紙上語爲雨爲雲
飄渺無憑據行到吳江楓落處自攜一葉歸家去

寒夜

鐵作衾綢冰作枕天意蕭條也學人情冷薄酒三盃容
易醒轆轤萬事心頭滾 數盡銅壺玉漏永茅舍荒鷄
啼斷陽關引淚點雙眸開炯炯紙窗浸破霜花影

一剪梅

夜落金錢花

曉風殘月過三生風裏身月下歸魂自憐薄命六銖
輕憔悴黃裙冷落紅塵一家姊妹兩般分夜合隨君
夜落隨君春光真不值分文雖有錢神難買花神

花燭詞

何物風流白面郎粉捏何郎香和韓郎天教撮合紫雲
娘玉琢蕭娘錦製蘇娘翠管催成宮樣粧山画眉粧
雲想衣粧銀燈低照合歡牀絃配琴牀帶並花牀

王氏孿生子同夜成婚用前韻

五綵雙纏午未郎伯稽王郎仲稽王郎七香並駕杜韋

娘大婦珠娘小婦瓊娘 一夜春風雨面粧雪點梅粧

月照梨粧鼓琴鼓瑟喜連牀坦腹東牀交臂西牀白汲兄弟

以五綵繩一繫于臂一繫于足任文二子德卿生于午道卿生于未張伯楷仲楷兄弟形狀無二楷音晏

好女兒

佳人

一捻脂紅百和香濃半醉嬌聲半醒態在坐卿鬟雲步
搖佩玉臥曲鞦弓 斜睨檀郎不語誰慣汝漫留儂問
此處不留何處去道朝上秦樓晚游洛浦暮宿巫峯

泥美人

彼美人兮半面風姿誰向粧臺描五色有顧愷傳神何

郎傳粉張敞修眉 可惜紅顏黃土立而望是耶非問
若个小名君識否是罷舞西施停歌子夜不笑褒姒

漁家傲

漁父

天下滔滔皆是也風波滿地江河假鼓柁行歌君莫訝

誰知者離騷莊子吾其亞

二書皆有
漁父一篇

一尺蓬舟雙闥打

綠簑青笠人如回潑刺黃魚穿柳掛收綸罷提壺闌去
樵夫話

春閨

夢鎖重樓春信杳綵絲偷把花覓釣籠內鸚哥沒緊要

頻嘶叫牆角海棠誰折了 左右懶粧和悶倒上裙腰
子驚人跳作怪鴉頭扯谎報才郎到愁眉錯對菱花笑
題沈開關繡顧茂倫濯足圖

我夢吳江煙水皺綸竿擬挂垂虹口不道逋翁濯足久
枕且漱滄浪一曲天如斗 深院玉人閒譜繡粉香妙
寫溪山友宛轉綵絲盤素手林下秀小名獨占毛詩首
定風波

納涼

不着衣衫不掃粧天邊趙盾逼人忙安得芳姿乞作婢
喚至手將團扇扇王郎 却羨摩訶池上路行去花梢

口吹露珠涼攜手歸來竹簟睡枕臂玉魚吐出口脂香

蘇幕遮

塞上 二首

朔雲寒邊月苦
虜粟西風吹亂
黃沙舞夜半雪深三尺
許攏帳駝峰倒載琵琶女
打圍來圈地去銀管炊煙
茶煮烏羊乳
蠻府參軍窮塞主
疋馬隨他看射南山虎
塞垣長寒信早
回角鳴鳴吹破霜天曉
一陣哀鴻殘月
小夢繞南雲淚濕征衫老
拄青山吟白草
燕雀排衙
公事彈琴了
又報黃旗前隊到手板
匆匆走馬遼西道

行旅用范希文韻

雪花天泥滑地漠漠同雲壓破山頭翠山接平蕪日接
水望斷村煙只在青天外 五更愁千里思茅舍孤燈
草草留人睡放着枕頭沒處倚角角鷄聲啼出思鄉淚

徐石兄卜居徐莊

鄭公鄉梅尉市安石塢頭王謝爭端起誰似南州徐孺
子天付吾廬預注高人里 十三經廿一史架屋堆牀
牖咏烏皮几竹舍茅廬何陋爾君子居之卽是名山水
牛山有謝公墩王介甫居之有詩云我名公字偶相同
我屋公墩在眼中公去我來敦屬我不應墩姓尚隨公
東坡謂與死人爭地界

怨東風

客思

蒲葉端陽寓又看銀河渡江山何事苦留人住住住破
屋頽垣古槐荒草滿庭秋雨泥滑長安路馬首無停
處一鞭落日又西風去去去茅店孤燈故鄉回首夢中
雲樹

旅悶

秋暑蠅成陣西日長如閨無聊所事不宜人悶悶悶薄
酒初醒孤燈半滅殘書獨枕愁縷繁方寸華髮添雙
鬢無端讀史更悲歌恨恨恨劒廢荆軻騅亡項羽弓藏
韓信

風中柳

和孫夫人韻

郎上長安怎好說些煩惱但叮嚀馬蹄芳草白來月下
把淚痕偷告夢兒中教郎知道一紙家書不覺低鬟
微笑報平安歸期尚杳金釵翠鳳送香車須早怕春去
燕殘鶯老

題沈耕道東軒又一體

楓落吳江一望煙波凝綠問東軒誰家茅屋南窗叢菊
北窗修竹倚胡牀酒香茶熟漁父相逢應許菰蘆借
宿扣舷歌離騷一曲烽煙滿目荆榛滿足任瀾翻長安

棋局

行香子

春暮

紫陌金車綠浦蘭橈共追尋大地芳華三分春色分與
誰家有一分山一分水一分花 雨打簷牙月落窗紗
恨韶光轉盼天涯小庭寂寞底事爭譁是一聲鶯一聲
燕一聲鴉

小園漫興

一个敦丘一个泥溝小經營水尾山頭煙霞舊管草木
新收有杏花春荷花夏菊花秋 萬里封侯四海登樓

問何如樵斧漁鉤主人高臥有客來遊是酒劉伶詩李白夢莊周

青玉案

無聊

江城蕭索愁如此門無客牀無史歌舞無人能作伎無
花無酒無山無水大抵皆無耳旅人却喜閒無事只
有夢來長伴爾夢醒空題詩一紙不如歸去縱然寂寞
萬事看家裏

江城子

清明旅思

江城佳節也清明喜新晴午風輕寡柳孤桃粧點可憐
生羅襪繡鞋人不見空辜負滿堤青客游隨分踏莎
行冷旂亭隔花屏無限家山綠水回船橫寶馬雲麾香
過處看玉手撥銀箏

吳門是日虎丘看會士女駢集

于秋歲

感舊用少游韻

落花簾外點點殘紅退雲穗亂風箏碎愁拈翡翠管恨
折鴛鴦帶薄倖煞燕兒難捉鶚哥對夢想瑤臺會繡
被同舟蓋錦字杳遺香在星移銀漢迤邐雨散巫峰收覓
去也化成精衛填青海

午日賦江明府

文通能賦夢筆如風雨采杜若瀟湘浦驅車越嶠遠岸
噴吳山暮衙放丁錦帆花月迎明府佳節逢端午勝
事傳三楚繫綵線穿菰黍壽盃菖葉酒樂語離騷句謳
歌者芙蓉江上喧龍鼓

壽何湘來

深衣革履道貌如秋水揮玉塵依香几心空四句偈口
擊三爻理蒲團上臥遊五岳華胥睡今日長筵會戲
彩高堂喜舞綠舞飛瓊吹洪崖酌鶴頂黃石羞麟髓謹
謝客先生笑飲茶而已

壽徐太夫人

人間天上富貴真無量三鼎甲同臚唱五花封邑誥九
節延年杖稱萬壽嚮臺鳳閣新官樣滿屋黃金榜滿
座青綾障藻綬舞輦衣颺兒觴浮玉酒婦饋連珠醬福
備矣蓬萊王母猶謙讓

風入松

寒鴉

呀呀掠盡碧天寒墨影滿青山太和門外常相見烏衣
隊爭點朝班應笑西風哀雁銜蘆辛苦榆關槎枒枯
樹倦飛還一幅回圖間誰憐羈旅金閨客烏啼夜歸思

闌珊借問幾時頭白早看改了朱顏

祝英臺近

憶別用稼軒晚春韻

玉爐殘銀燭暗画檝維南浦黯淡東風早洒淚痕雨惱
他順水船兒幾株楊柳甚力把征帆拴住空相覷欲
將心事叮嚀題多總難數獨夜思量記起枕邊語算來
萬種春愁妾擔不起分一半與郎隨去

一叢花

游朱氏園亭

江村踏踏半平沙木樨縛籬笆誰引劉郎來洞口隔牆

見人面桃花數曲欄杆幾條書畫也算小山家
花名人面桃
主人白髮話煙霞虛閣倚風斜池邊指點平安竹穀雨
近芍藥抽芽新出筍尖舊藏桂子撮合點新茶

金人捧露盤

盧龍懷古

出神京臨絕塞是盧龍想榆關血戰英雄南山射虎將
軍霹靂吼雕弓大旗落日鳴笳起萬馬秋風問當年
人安在流水咽古城空看雨洗金鎖苔紅健兒白髮閒
驅黃雀野田中參軍岸贖戍樓上獨數飛鴻

最高樓

漫興

拋官去乞得小山居
偃仰此生餘
何用食爲十斛麥
未之學也
五車書時還讀亦已種則何如
待討个漁童
名便了再配个樵青
名大好賽赤脚勝
長鬚奴更養奴
千樹橘婢還釣婢
百頭魚挈山妻同稚子
且相於

慕山溪

夏興

登樓極目又見斜陽下
遠近兩三峰
一點點翠睂如畫
鶯簧蟬鼓楊柳舞輕風
人閒暇天瀟酒惆悵如何夜
白衣蒼狗闔盡雲
真假今古總悠悠
歎舉世塵埃野馬

青天難問搔首且歸來沉醉也高眠罷月上葡萄架

意難忘

元宵

蘇城初散防兵張燈甚盛

春色佳哉報吳宮花柳羯鼓方催羽林千騎去華屋萬
家回羅帳地錦衣街燈火上樓臺看滿城星橋高揭火
樹叢開月明車馬如雷有舞旋鮑老歌打洪崖香塵
移回易玉燭裊金釵簾幌下影徘徊聽笑語訴諸百忙
裏闌成燈謎擲與郎猜

百末詞 卷四

長洲九仞

長調

滿江紅

偶覽稗史載王文成夢郭景純極言王導之奸
敦之反導陰主之也因爲賦此

奸个夷吾渡江後久窺神器誰更念神州未復江河頓
異堪笑一生蘇武節曾無半點新亭淚問亂臣賊子出
臣家誰之罪 王與馬久分據敦與導還同計算敗終
爲相成當爲帝漫惜伯仁由我死太真拔舌斯何意歎

誰將趙盾弒君看書其事

感遇

我醉欲眠且收了眼光青白分付與死便埋我陶家之
側天下山川吞八九腹中人物容千百任諸君拍手笑
狂生乾坤窄破面鬼焦頭客烏帽吏黃巾賊問何人
請劍何人投筆我夢化爲蝴蝶舞醒來敲碎珊瑚缺歎
一腔熱血洒何時青衫濕

生日自題小影二首

鑄錯難成空贏得頭顱如許君不見此中有鬼英雄無
主世事夢迴開塞月文章淚盡瀟湘雨歎茫茫宇宙此

身多無歸處 山岳裏聊容與竹林下方延佇但看他

白眼科頭箕踞背後好遮王導扇手中只少漁陽鼓攜

一盃自祝回圖前覓相語

小像科頭跣足坐竹林下童子執扇于後

甚矣吾衰誰画出秋風蒲柳須信道相君之面不過村

叟車蓋鼓吹今夢覺空山晏坐搔童首問何人不著鵝

鵝冠惟君否 且避暑頻揮手謹謝客休開口祇先生

生日歸而謀婦半臂纔更一斗麪百錢恰買三升酒對

此君爛醉仰天眠看蒼狗

王后謂明皇日不記三郎生日令阿忠脫半臂更得一斗

麪耶

思隱二首

寄語青山爲我築數椽茅舍更計較鑿斯池也衡門之
下屋後十弓放筍竹牆邊五畝栽桑柘還留些隙地種
梅花依臺榭北海釣南山射東墅弄西園画有鄰翁
來往鷄豚春社笑問老妻能去否蒿簪藜杖歸休罷但
囊中尚乏買山錢從天借

袞袞諸公看朱紫白頭隨駕儘讓與蠅頭蝸角冷盃殘
炙夫子漫勞冉有僕小人請學樊遲稼向深山好作古
田家讒皇話松菊徑瓜藤架麋鹿柴魚鰕飯且醉吟
高臥及時閒暇稚子浪尋青草圃老夫合受黃鸝罵倘
城中有客訪吾來關門謝

上巳旅思

天朗風和是昔日蘭亭春社恨不見一時名士烏衣士
謝光祿文章曲水讌子山馬稍華林射到吾徒意氣向
誰人都休罷四海事歸耕稼五嶽志銷婚嫁但短衣
長鋏棲遲傳舍醉去行歌城闕上醒來坐嘯牆籬下聽
大江滾滾客心悲流日夜

余淡心初度和梅村韻

對酒當歌君休說麒麟圖畫行樂耳柳枝竹葉風亭月
樹滿日山川汾水雁半頭霜雪燕臺馬問何如變姓隱
吳門吹簫者蘭亭禊香山社桐江釣華林射更平章

花案秤量詩價作史漫嗤牛馬走詠懷却喜漁樵話看
孟光把盞與眉齊臯橋下

倦游初歸顧菴繹堂處實旣庭枉集草堂用顧
菴原韻

梅雨廉纖問昨夜小池微漲漫一笑征衫乍脫故園無
恙翠繹移來石徑側黃鸝啼到桐陰上更村村煙火起
農歌田家餉報有客扁舟漾看滿座蘭亭唱喜酒徒
相對欲傾家釀却暑但揮蟬雀扇登高請進蒲桃杖向
西山指點夏雲生多奇狀

卽席贈顧菴學士

二十年來歎世事塵羅波漲喜老友跳歸燕市髮眉無
恙皂帽幸辭遼海外青衫還泣潯江上問榜門誰是脫
驂人千金餉且上下隨流漾子解和公能唱須痛澆
魂壘洞庭春釀屈指明年將半百看雲取次從藜杖又
何勞呵壁續離騷箋天狀

顧菴長予一歲明年五十矣
予堂名看雲故用杜句

卽席送繹堂憲副北上并寓都中同好

才子仙舟坐春水柳湖新漲從此去黃河千里布帆無
恙玉殿傳臚原日下金門待詔還天上料至尊早辦
大官廚爲卿餉斜日下雕旗漾芳草路驪歌唱送關
山牙祭一樽清釀使客自騎沙苑馬野人獨倚柴門杖

倘諸公問訊僕何如窮愁狀

飛濟祠部辭疾不至柬以訊之

太息丁生出塞去雪堆沙漲謝弋者遼東歸鶴令威無
恙浪跡偶來臯廡下端憂却據胡牀上正提壺盧橘滿
林黃堪分餉端午後蒲葵漾麥秋至螻蛄唱君奚爲
高臥欲逃村釀游千渡江不用楫健兒躍馬寧須杖劇
何堪新婦閉帷中婆娑狀

憶別阮亭儀部兼懷西樵考功湖上

我發蕪城趁競渡一江風漲爲寄語池塘春草阿連無
恙白舫已乘東冷下青驄尚躍西冷上問錢塘可接廣

陵潮雙魚鮓 採蓮棹湖心漾折柳曲橋頭唱辦十千
兌酒餘杭新釀王子正招綏嶺鶴孫登也策蘇門杖待
歸來贈我兩峰圖空濛狀

時阮玄有秦淮之役
西樵與孫無言俱

寄呈荔裳觀察

西樵荔裳先有和詞故及之

北望盧龍痛精衛填溟漲何幸得南樓老子下官無
恙千里相思風雨夕十年重過江湖上笑故人祇有一
盃葦爲君餉 飛蝶夢游絲漾騎馬地朝鷄唱算半生
白髮星星愁釀笠澤煙波宜載酒泰山日觀聊攜杖再
休提宋玉賦秋風悲哉狀

苦雨書悶

積雨東籬雷隱隱冰雲時漲休夏好繩牀藥日消摩微
恙讀史喜觀秦楚際咏懷高話羲皇上笑飢來驅我走
天涯無人餉愁何許懸旌漾悲未已吹簫唱怪衆人
皆醉覆盃沉釀勘破黃梁道士枕打開白業瞿曇杖咄
何來修竹彈甘蕉紛投狀

顧菴復和八首見示賦此答之并貽旣庭

何物文心筆陣老墨池飛漲賈餘勇吟成八咏撚髭無
恙公子七哀傳鄴下大夫九辨賡江上驚從而和者曲
彌高三縑餉倒詞峽真潰漾短歌闋長歌唱只江郎
才盡渴求盃醴我倦欲投杖竹管公豪任奪青藜杖問

紅箋填得許多愁難於狀

春夜集淡心齋和韻

乘興而來冒雨過徵君之宅相對者詩家三老酒徒八
伯秉燭夜游行樂耳一生能着千雙屐看勝爲可喜敗
欣然如子奕一痛飲也腸千石劇談也唇三尺算樽前
只少紅兒催拍便唱鷓鴣休聽好坐中半老江南客問
阮公醉後眼如何全飛白

壽黃處安中書

問客何來自閩海薄游吳苑忽舉目天涯烽火故鄉中
斷澤國江山驚戰鼓秋風零雨飛賓雁正登樓作賦楚

天高愁王粲 十月節寒花綻千入石清樽
燕喜今朝
初度親朋相見回首紫微舊夢杳放懷
白髮餘生健但
摩挲毛穎老中書加餐飯

夢

日日愁生賴有此枕中之夜我夢見大千境界無非假
者花月春江堪舞蝶煙波瀚海能騎馬儘神遊萬里恣
逍遙闌風野 邯鄲道何瀟酒陽臺下何妖冶但逢塲
作戲機心都化烏有先生相對好亡何鄉裏歸休罷奈
一聲鷄唱又天明愁來也

淒涼犯

寒更

愁人影共殘燈語夜寒何處尋夢淡月微籠酸風乍咽
嚴更徐動孤衾自擁聽聲聲如迎似送想依稀長歌短
泣數闌譙樓弄多少朱門客錦瑟彈蛟玉簫吹鳳樓
涼伴我吉丁當打入心孔斷續隨風又接着曉鐘鳴空
問鷄人銅壺漏水幾點凍

水調歌頭

贈隱者

左手招明月右手引清流遂棄人間俗事長伴赤松遊
春與猿兮吟嘯秋與鶴兮飛舞八百歲春秋夜授南柯

守朝拜酒泉侯 攜玉杖吹鐵笛酌金甌醉鄉高臥掉
頭那問帝王州自謂羲皇以上無論晉魏之事涓子不
能傳我亦問津者願汎武陵舟

解嘲

卿自用卿法吾亦爰吾廬一生着幾兩屐安用美哉車
種得東籬五柳飲得東臯五斗此外又何須已夢我爲
蝶誰識子非魚 書咄咄稱好好解如不如說鬼妄
言妄聽莫辭無人貴及時行樂我也逢場作戲軟飽黑
甜餘莫問九州事且臥一牀書

中秋

秋月忽然好游屐滿山前遠觀燈火樓閣萬點小星懸
遂隊王孫公子繞坐歌兒舞女人歷看場圓獨有悲秋
客白眼對青天 千古事一場夢總堪憐吳宮明月在
否典廢幾何年無限朱門綺戶也有竹籬茆舍皓龜一
般全休待玉簫微我欲臥漁船

醉歌

左手把盃酒右手握刀環快哉吾欲浮白醉卽舞雙丸
讀聖一編遺史斷盡千秋公素怒髮每衝冠椎鐵擊秦
政搗鼓罵曹瞞 而今事增一笑總般般人情大抵難
測翻覆似波瀾休問英雄豎子富貴合輸公等已矣復

何言仰視四天白長嘯倚欄杆

平遠堂雨中送春

山上雲爲雨山下雨爲煙不分煙與雲處祇聽雨潺湲
舊雨送春歸去今雨倩人留住去住總堪憐春入遠天
外人立晚風前試煎茶宜折柳共題箋千戈未定樂
酒今夕惜流年爲問千人石上妙舞嬌歌何處空谷一
詩筵日暮下山去騎馬似乘船

途中大水

送陳次山

三月鶯花節送子出青門我向離亭貰酒曄汁染衫痕
河畔萋萋芳草陌上依依楊柳極目總銷魂往問廣川

子幾策玉盃存

主人董氏

素鬚筆攜欄具貯蠲樽但讀離騷

痛飲醉卽舞青萍試渡滹沱河北還過邯鄲城下慷慨
滿乾坤去矣陳驚坐舌在不須捫

滿庭芳

風雨夜懷卿謀

折絮天風凍花側雨薄寒新上羅衣可憐人意恰對可
憐時幾度思量往事回首處風景淒其難生受黃昏院
落獨自怎支持想伊人此際籠香弄筆剪燭吟詩待
扁舟相訪夢到還迷只聽數聲征雁斷雲裏叫過樓西
呼來問又推深夜不肯寄書飛

游婁東張氏園

山出籬前水周堂下高軒插架朱藤亭臺新綠曲徑隱
斜曛正好清和天氣黃鸝喚遊女如雲羈棲客苦無柑
酒獨坐弔殘春 當年行樂地青簾白舫夜醉紅裙聽
鈿箏瑤管歌舞芳塵不見富平公子樓中燕空怨黃昏
湖山畔蕭蕭松栢明月照孤墳 園有主人墓

偶語

甕裏醺鷄禪中蟣蝨人生大抵皆然蠻爭觸鬪割據錢
山川多少移山填海憑意氣不肯由天下塲頭總堪一
笑鼓罷戲文完 算浮生如夢轉開得失彈指悲歡且

不如高臥圖取奇緣只恐夢中占夢夢醒後又費流連
都輸與希夷老子一覺便千年

王煙客太常八十

七葉門風三槐世德先生作述無憂筆精墨妙名下更
空儔富貴公家自有但稱壽八十平頭等而上老彭八
百大樹八千秋 優游興不淺西田倚杖風月嘲謳看
兒孫戲綵白馬青裘笑問香山洛社齊年者大十同浮
吾家老與君成二來往亦風流

象君同庚故引杜句足之

鳳凰臺上憶吹簫

夢亡友卿謀

玉樹生埋香鈎殉葬人間無限傷心聽山陽鄰笛淚疏
衣襟長憶連牀對酒燈影裏淺笑微吟斯人死坐看卿
輩誰是知音晉人云使卿輩存斯人死追尋天邊去也盼十二樓中
雁斷魚沉甚風吹環珮夢倚瑤琴依舊壁人一對攜手
處翠袖花簪應歎我關山搖落髣髴髮蕭森

天香

咏龍涎香

雲氣盤山雨痕粘草海天遙識龍睡細剪香涎平分瑞
腦汎水滲沙同膩龍涎上品汎水次日滲沙煙鬟霧髻髣髴兒纖綃
娘子檀口唾花幾點絲絲篆成心字 猶憶瑣窗半閉

裊金鳧共消殘醉惆悵遺芳夢香蘅蕪誰寄聚窟返覓
何處空留下餘薰舊鴛被羸取鮫人玉盤珠淚

漢宮春

觀演邯鄲夢

咄咄臨川能現夢中身而爲說法邯鄲道上一枕悲歡
離合青驢黃犬好粧成紅妻綠妾等閒看鬼門關外何
殊洛陽宮闕休笑盧生癡絕算一場春夢大家收煞
黃梁半甌炊過幾朝年月曲終人醒玳筵前酒盃猶熱
又歸來獨眠孤館今夜應添白髮

燭影搖紅

壽吳水仙夫人

甲帳瓊臺彩鸞初嫁年華妙紅窗窈窕日無愁但見媽
然笑笑盡珠圍翠繞誰解受筆封墨誥画簾乍捲香篆
微聞湘統淡掃金石摩挲青編粉印看新稿酒闌燈
地憶當年夢破巫山曉應是胡麻飯飽映桃花風姿不
老拚試輕鞭幾時搔背麻姑烏爪

題女士張采于衡樓集和來韻

地老天荒悲歌不獨江淹恨小庭風絮也關愁林下重
題韞應付鶯花管領好看承車香障錦胡然空谷翠袖
天寒衡門樓隱繡戶燃脂彤奩古畫粧臺韻斷腸哀

怨爲誰吟宛轉繁
方寸欲倩蕭郎寄問
早消除風淒月
悶試拈湘管愛劈鸞
牋疊成方勝

聲聲慢

旅思用易安韻

花開柳閉燕去鶯來
東君于甚休戚一樣
春風二十四
番消息朝來又添細
雨大江頭落潮偏急
春莫去縱他
鄉暫遇故人曾識
休笑春光已老看鏡裏
白髮數莖
堪摘苦把春風留住
怎能吹黑空著枕頭
一半聽銅壺
淚點同滴這時節
便夢中人到也得

夢楊州

客廣陵用少游韻

晚潮收歎脩宮花月都休寒雨蕪城綠楊三月如秋市
門十里黃埃滿但往來車馬星稠紅橋畔青樓底誰人
勾當春愁 追想樊川狎遊報書記平安廿四橋頭笑
我多情髻絲禪榻空留紗燈萬點歸何處枉斷腸錦瑟
簾鉤平白地揚州夢醒惱亂蘇州

夢芙蓉

寒月

一般明月夜最春園花裏秋山林下玉階如水枕簟也
消夏三冬都告罷殿須廣寒高掛顧影無人只天邊青

女相伴素娥寡 我獨徘徊旅舍夢想遊仙飄渺聞風
野冰九一顆晶色冷相射御風疑羽化何須歌舞臺榭
但買春醪呼酒徒痛飲編作客窗話

玉蝴蝶

雪窗憶卿謀

淅淅蕭蕭瑟瑟疎疎密密整整斜斜算有三分牆角數
點窗紗響茅檐風敲斷竹迷野渡月上平沙浪相諺瑤
林瓊樹種玉人家 嗟嗟閉門高臥誰見無分且喫團
茶翹首天涯空吟冰柱憶劉叉盼書郵浮沉征雁尋驛
使冷落梅花問君家剡溪不遠可汎星槎

賀高亮納姬湖州

應是三生杜牧深紅淺綠再接花枝正好珠璫珮解金
雀鬟垂定情詩早憐碧玉小名銖恰比紅兒儘綢繆描
殘翠管寫盡烏絲相宜綠衣方小青衫未老絲縷初
飛顧曲郎君記歌娘子按新詞學秦箏爭傳妾解偷吳
語未許歡如畫中人五湖一葉載到西施

念奴嬌

午日旅思

葵花艾葉依然是前度端陽家數菰米蘭橈問甚處弔
望楚天雲樹乳燕初飛流鶯三弄幾陣黃梅雨飄零湖

海何堪蕭寺孤注 遙念寂莫紗窗萬蒲剪了黯停盃
無語別恨離愁添幾許鬼病懨懨情緒整日沉眠夢覓
無賴不到長洲路除非借取画船競渡歸去

贈吳梅村先輩用東坡赤壁韻

江山如夢歎眼前誰是舊京人物走馬蘭臺行樂處尚
記紗籠題壁揀燭衣香少年情事頭白今成雪杜陵野
老風流獨數詩傑 更聽法曲淒涼四絃彈斷清淚如
鉛發莫問開元天寶事一半曉星明滅我亦飄零十年
湖海看雨絲風髮何時把酒浩歌同送明月

和羨門韻二首

百年彈指奈頭顱
斷禿肝腸如碎飛
將高皇時不遇却
過灞陵亭劇感慨
何爲不如歸去也
學糊塗醉文章有
命此生萬事難遂
眼看世態悠悠西
江有木不到枯
魚肆脫了青衫披
綠箬且飽銀絲鮮
膾棄蟻亡羊於魚
得計吾讀徐無鬼
人間不樂相忘惟
一回睡

先生休矣歎元龍
豪氣俯同羣碎借
問史公牛馬走豈
若爛羊都尉滿座
貂蟬狗偷鼠竊偶
爾乘天醉何如尋
取當年初服堪遂
君見入市者平朝
來駢足日暮成
空肆損益盈虛都
似此所以步兵思
鱸紫綬耶又緋衣
羅刹羣小皆名鬼
署門謝客主人今
日斷睡

送孫無言歸黃山和顧菴韻

忽聞長嘯是蘇門
鸞鶴遺音清絕彈
鉞歸來櫪具劒更
鑄山田耕鐵手拍
浮丘吾廬偕隱漫
卷君卿舌署門謝
客白雲無處停轍
回首花月揚州幾
年夢醒暫賦蕪城
別騎鶴吹簫人在
否笑看迷樓煙熱
垂老生涯首陽柳
下計較誰工拙遲
君贈我三十二峰
寒雪

飛濤其年雲客旣
庭御之枉敘草堂
和飛濤韻
古人安在總上塲
優孟下塲翁仲天
壤之間存我輩聊
爾一觴一咏僖父
左思老兵阮藉歌
辨衙官宋當孟行
令戲猜三兩橫縱
酒後耳熱狂呼濡
毫呵壁欲把天

自未詩
公控趁取吳官春未老甘與梨花同夢銀燭方長銅壺
初滴路近東西弄諸君且住牀頭尚滿青鞵

飲梁宗伯蕉林書屋賦贈

疎簾清簟正高臥南面百城書屋丘壑夔龍權寄傲勾
當午橋松菊白衿論兵深衣習禮總付漁樵曲東山未
起中年聊寫絲竹 今夜河朔開樽止談風月醉掃愁
千斛咫尺長安君不見頃刻浮雲翻覆紫禁宜麻黃扉
視草早叶金甌卜江南野老夢留東閣樺燭

歸興

廻車哭罷忽仰天大笑冠纓索絕大抵長安局似奕正

打轆轤雙劫東閣除書西臺彈事早暮分涼熱一言以
蔽無財不可爲悅 君看游客紛紛吹竽鼓瑟槐柳森
齊列何異乞兒爭向火轉眼灰飛煙滅或問先生何爲
至此僕亦無言答掉頭歸去閉門獨臥寒雪

題席次文出獵圖和梅村韻

是何年少向長城飲馬沙塲結客臺上呼鷹壚下醉尚
弄數行題墨投筆歸來東山射虎大羽猶能沒畫圖留
取黃雲萬里秋色 我亦蠻府參軍短衣長劍喜逐將
軍獵回首盧龍成舊夢變作陽關三疊仰屋看書叩門
乞食恨少朱家俠相逢痛飲頭顱如許堪惜

咏米家燈和其年韻

尚書堂上忽鸞飛鳳舞花枝分亞起剔銀燈相視笑認
得米家書画木鴿兒郎弓腰仕女遊戲無真假針神妙
手怡從阿堵傳寫正是月滿千街星移萬點天放元
宵夜遙想漢宮傳蠟燭光照綵樓縹玉漏停催瓊簫
慢弄暫醉珠簾下燕臺勝景剪燈重譜新話

羨門五十一歲夫人四十九歲十月得子名曰
百齡是可賀也調百字令

世間奇事看木公金母合成百歲夫婦平分大衍數陽
進因而陰退進若有餘退非不足損益剛相配乃生男

子美哉則百之瑞 以是名曰百齡在百家姓上百官
圖內好似百花蘭桂發百鳥鸞鳳出類書讀百篇財盈
百寶百祿天生備賀君百喜百壺索取同醉

桂枝香

月下

晚風搖曳漸吹落殘烏素娥睡起驚看鏡殿堆玉晶宮
映水井梧颯颯敲窗紙怨鴻啼蘆花岸裏黃昏院落画
欄獨倚寸心如死 秋色三分將盡矣更寒煙滿目疎
鐘第幾四壁蟲聲助予歎息而已南飛烏鵲無枝止笑
歸來昨非今是今夕何夕舉盃邀月陶然醉耳

咏蟹

漫尋爾雅見介士橫行郭索盈野最愛紺甲青匡金膏
雪炙吳江公子腸應斷甚西風酒旗簫酒相逢何處沙
汀漁火村庄茅舍 記卓女長卿初嫁爲彭越低眉傳
箸不下我亦蝤蛸暗想粧臺愁把 王吉夢一蜚蜚舍都
亭翌日司馬長卿至
古曰此人文章當橫行一世因呼蜚蜚爲長卿文君終
身不食先文簡公戲呼楊文公爲羊揚戲呼公爲蝤蛸
以音同也香橙手劈吳鹽細欲持螯誰傳盃竿霜華滿地黃
花已老玉人去也 時子悼亡

齊天樂

咏蟬

小園疎柳斜陽晚淒然數聲低喚吸露頻啼迎風乍咽
迸出悲絲急管宮商偷換和五夜寒蟄一天哀雁恨殺
螳螂驚回焦尾鵲絃斷 當年齊女曾變故宮衰草外
何限秋怨羅袂無聲玉墀塵滿落葉幾番零亂餘音宛
轉想動影低鬟粧殘簾捲杜甫山妻夜飛人不見子去歲九月
月病中詞有不見夜飛蟬山妻劇可憐之句今年九月
婦亡亦詞識也

百未詞 卷五

長洲尤 侗

水龍吟

楊花和東坡韻 二首

美人滿院紅粧綠珠忽向高樓墜非雲非雨非朝非暮
一天春思繡閣嬌慵厭他輕薄重門深閉奈偷從牆角
窺來窗畔人前故眠羞起 可惜風流掃地賴多情青
苔牽綴生成薄命飛來又被鸚哥啄碎一縷殘魂浮萍
再世去隨流水想深宮拾得踏歌連臂有人垂淚
捲簾但見飛花何時開起何時墜玉人如夢隨風遊戲

幾多愁思爲問章臺青青在否宮勉應閑剩纔腰解舞
飄飄上下還學三眠三起分付雕梁燕子好銜將小
巢縈綴謝娘纖手搓來捏去團成復碎忽地傷心人間
天上落花流水倩軟綿堪拭此中洗面只餘清淚

咏白蓮

誰家淥水銀塘凌波扶出霓裳女天然素而冰肌玉骨
暗香銷暑採向吳宮画船相傍盈盈解語看碧天涼夜
風清月曉長依白鷗爲侶幾處紅衣亂舞翻嫌他脂
勻粉浣蓬茅蒸縞鉛華洗盡淡粧偏嫵最恨西風斷也
憔悴幾番秋雨歎隨波敗葉飄零低滴淚珠如許

瑞鶴仙

慈仁寺松

歲寒尋老友祇蕭寺喬松交情耐久吾衰甚矣憊故人
喜相見支離羣叟春風桃柳滿長安紅爭綠闌讓髯公
沐雨梳霜到底青青依舊安否九達闕處五市開時
貨財輻湊衣冠奔走洒斯辱澆盃酒勸怒濤休吼晨鐘
暮鼓且共佛燈厮守更呼來鶴喚長空一天星斗

石州慢

和高季廸韻

花信頻催二十四番雨飄風洒多情最是風流楊柳瘦

腰一把樹猶如此何況人倚闌干游絲和夢愁牽惹淚
斷錦迴文借烏絲重寫姚冶玉人應在燕子樓中湘
簾垂下記得青鬟微笑紅牙輕打而今寂莫空想院落
秋千幾時再駐牆頭馬驀聽杜鵑啼道東君歸也

拜星月慢

惜別

香霧雲鬟清輝玉臂雙照淚痕猶在忍令分攜怯空房
難耐無人處生怕落花風起輕把檀痕吹壞惜惜情懷
料身中不快問何曾走馬章臺內又非因帶甲榆關
外何苦東去西飛判相思分界看彈琴誰寫芙蓉燕半

薰香莫綰鴛鴦帶只好教籠裏鸚哥兒那人無賴

花犯

西山晴雪

遍皇州玉龍紛舞千門六花繞燕臺高眺見一點西山
裝作瓊島翠微低處斜陽照朔風飄不了掩映着瑤林
琪樹煙中飛白鳥我來薊丘笑行囊空餘幾兩屐臥
遊難到灞橋畔趁不上剡溪一棹翻追憶故園雪夜萬
峰裏梅花消息早只好倩小樓鐵笛吹霜天角曉

喜遷鶯

立冬

朝看月令是律中應鐘神司元冥寒日模糊陰風凜冽
一掃秋光無剩誰遣倪送妙手寫出灰堆冬景茅簷下
聽數聲鐵馬冬冬相應 長安多肉陣鳳炭檀爐低唱
羊羔飲閉戶先生擁書枯坐只好敲冰煮茗莫怪天公
作惡雅稱玉堂官冷青鏡裏驚漫空霜雪又添雙鬢

綺羅香

咏香

髮髻初梳譚禱乍脫文几鵲爐先置銀葉如錢半晌篆
煙纔度繞紗幬爲雨爲雲罩繡閣非花非霧更憐他入
紉衣裳徐徐引到銷魂處 玉人體自生香借三分迷

迭助成佳趣、心字裝成還向月中微步識好事喜結雙
絲訴幽情私添一炷付鈿盒小玉珍藏莫放郎偷去

二郎神慢

李笠翁招飲觀家姬新劇

百花巷

笠翁寓所

乍小隊花神來降看面似芙蓉眉似柳點

素額簷梅初放蓮襪榴裙花下舞桃葉渡采菱新唱湘

簾捲蘭香暗度風動羅衣微颺

惆悵分明仙樂大羅

天上聽趙瑟秦箏吳苑曲

緒姬皆產燕趙

如殺粉君脂相自笑

周郎愁眇眇好央及燈花剔亮

短視故云

怕飛逐彩雲牢

繫鸞凰重重綃帳

歸朝歡

澄海樓

家在芙蓉江畔住兩槳沙棠桃葉渡天風吹我北溟來
芒羊一望無窮處漫將秋水註此時好讀玄虛賦倚危
樓不聞呼嘯滿耳驚雷雨却怪馮夷緣底怒白馬乘
潮鳴急鼓鯨人又喜駕樓臺璇宮出市珊瑚樹風鬟霧
鬢女戲彈寶瑟來迎汝趁漁舟一聲欸乃送我蓬壺去

望海潮

觀獵

遼西重地東臨碣石朔風塞馬蕭蕭臺上呼鷹磧中走

狗千人弓箭橫腰牙齙抗招搖看雕翎落處兩血風毛
日暮山空寒鳥飢兔正悲號將軍坐地分曹有健兒
行炙美女彈槽再打一圍揚鞭歸去戍樓回角聲高何
似霍嫖姚笑當年猿臂射石空勞顧語參軍醉中磨盾
好揮毫

望湘人

閨信

自君之出矣獨宿空房繡衾慵熱龍腦背着燈兒側身
帳底多半和衣睡倒簾幙花香欄杆燕語月明如曉好
良宵滿院春風不見斷腸人到乍夢被郎呼去向画

屏深處輕憐低笑正勾當相思一晌銷魂未了無端撼
起流蘇微動驀地把人驚覺閒滋味費盡思量私下報
郎知道

風流子

醉中作

吾生所一夢將進酒結客少年場願貴比五官芙蓉車
蓋艷齊三婦玳瑁釵梁封侯事建牙刑白馬挽箭射黃
鸞鼓吹歸來角中辭去拍肩秦華濯足滄浪醒來都
不是看衣鶉馬狗兩髭秋霜贏得一官孤竹三徑柴桑
只未玉招魂偶逢神女相如賦曾視君王且向傳前

醉也長短歌行

疎影

黃梅花

花神戲法向園林剪綵點綴殘臘磬口玲瓏荷蓋團圓
髣髴香生金鴨前身本是江妃種催粧早先來一霎恰
阿嬌初染鵝黃纖指欄邊偷捻耐盡霜侵雪壓愛自
然幽雅不近蜂蝶我夢羅浮錯認佳人賺得翠禽嘈雜
當年倚袖天寒日插蟬髻夜藏犀合到而今攜向紗窗
空有淚花凝蠟

霜葉飛

黃芽菜

吾家老圃東籬下曾將野菜修譜但知春韭與秋菘食
齊腸還苦今領畧長安雜俎黃芽一把和鹽煮覺入口
甘香似燕趙佳人風致冷淡如許君看輦上華筵金
盤玉膾誰向此君下箸偏生我輩一條冰堪作冰壺侶
任嚼出宮商徵羽只愁面色平分取却回思故鄉味干
里尊羹惟吾與汝

宣清

玉河水

黑帝乘權爰命波臣璇宮大開冰屋明黃河粉壁萬層

掩青江銀練千幅曉入金門環
倚一望果然如玉正平
鋪鳳樓前寒光直射朝旭
天子詔凌人宜藏北陸百
官賜飲足縱鏤樹成花凝簷作飭
天回文章未必重
瞳娛目念鄉村荒田野哭問邊庭
鐵衣起粟何時泮
漸借太液恩波布春風煖生寒谷

沁園春

送窮

咄咄窮來冰氏主人勸汝千盃怪子雲高閣一麾不去
昌黎上座三揖仍回餓倒翳桑凍穿東郭拊手揶揄笑
我該何相厄出門如有礙閉戶如呆
特憑毛穎符牌

擇吉日車馬走天涯向簞瓢巷裏生前可住首陽山下
死後堪埋耕硯爲田積書作庫今後休將壁立猜窮唯
唯吾從此逝矣贈子多財

釋愁

試望愁城天地無光壯士吞聲奈悲秋宋玉不堪天人
傷春杜牧未免多情萬斛紛來百端交集方寸之心難
與爭歎人世黯然銷魂者惟此爲深 僕今奉教先生
毋勞爾神兮搖爾精使王喬與我遨遊而逝黃公與我
歌咏而行寂莫爲牀立虛爲宇叱咤驅愁服上刑愁休
矣逝將適樂土實獲吾心

遣病

若有人兮蒲柳風姿憔悴支離恨雍容司馬拋殘賦草
風流沈約瘦損腰肢扁鵲低頭巫咸束手文室維摩亦
皺眉數其罪合先誅二豎後斬三尸飄然與彼長辭
况苦口良方我有之倩冀州坐客揮毫草檄少陵野老
信口吟詩左援桐君右攜歡伯楚客高談七發詞渙乎
一泓然其汗出是乃良醫

反止酒

有序

辛稼軒有止酒詞然吾輩酒狂也又當此時此中雅
宜此君豈忍囚酒星於天獄焚醉月於秦坑哉

陸醕前來枚卜功臣衆口交推彼從事齊州清爲聖德
督郵鬲縣濁亦賢才堯舜千鍾仲尼百斛子路寧辭十
榼陪髡一石更先生五斗學士三盃 嘗聞上頓長齋
卽乘馬騎驢事盡佳况卓家少婦爲君滌器楊家妃子
爲我持罍山帶蘭陵水連桑落麴部分茅議允諧咨汝
醕俾侯醴泉郡曰往欽哉

非酒 有序

余旣反止酒數與醕往來稱肝膈友已而病憊嘔出
心血醫者曰是酒之罪也天有酒星故傾於西北地
有酒泉故缺於東南人有酒腸故傷於中心若婉彼

狂藥亦如劉將軍負鍾從之耳予惕然吾待醕不薄
奈何負我請絕交於是復召陸生而告之

醕若毋聲以酒爲名乃罪之魁算持蟹螯者甕中就縛
吹龍笛者水底長埋金盞纔擊玉山便倒玩我真如兒
戲哉腐腸藥甚良醪可戀心腹當災 今朝焚了糟臺
又何問蓮花白玉盃倘君將伐狄臣當執御人能擊柱
我願持鎚草奪黃封驅除綠蟻主爵壺商賜自我醕不
道削汝懿侯職以警將來

夢卿謀

有序

小春月夜夢與卿謀作一夕話有客二人有酒一壺

酒後耳熱卿謀賦如夢令二闕示予予讀竟欣然和之相視一笑二客方苦吟予已瞿然覺矣初醒盡能記憶及東方旣白遂成恍惚惜哉數日後念此反爲傷神因紀此相寄嗟乎豈非所云如夢者耶

有美人兮攜手同行其樂只且喜化爲蝴蝶中宵起舞喚他啼鳥野店提壺一唱高山再歌流水聽者鍾期鼓者俞長太息曲高而和寡其信然歟 顧君與我何如彼天下紛紛安足拘歎故人千里遠遺端綺主人倉卒遽贈文無慙帶荷衣倏來忽逝烏有先生對子虛開戶視不見其處矣搔首踟躕

題李鏡月廬游日記次南樵韻

奇絕青蓮幾輻芒鞋直路匡江向香爐峰下呼來慧漬
珠簾谷口吸出康王五老婆雲山人漂渺三疊流泉噴
石岡還識否是廬山面目仔細端詳 小奚亟解詩囊
看搖筆高吟字萬行笑近騎白鹿踢翻星渚遠攜黃鶴
飛過潯陽君已逍遙僕猶惆悵画壁鴻琴寄興長問何
日把驚人謝朓搔首青蒼

和阮亭偶興 二首

無可奈何舊事南柯新恨東流歎易變人情幻如演戲
難猜新法悶似藏鉤閉戶無容出門有礙何況崎嶇歷

九州不堪者看宮中狗監關內羊侯 頭顱如許誰酬
但醉裏乾坤恣拍浮筭冥冥高飛于人無怨悠悠行邁
謂我何求蝴蝶前身杜鵑今日伯仲之間海士鷗乃所
願學丈人荷篠男子披裘

我所思兮濯足清流晞髮高岡奈舉國侏儒臣飢欲死
滿堂酒漢公醒而狂學劒不成賣漿未售肘後難傳療
恨方除非是學中山千日夢到羲皇 覺來起舞淋浪
且讀破離騷續九章喜莊子逍遙人呼以馬左慈狡獪
或化爲羊手弄雙九目空九點竿木隨身作戲塲今而
後從子虛隱矣何有之鄉

戒遊二首

子好遊乎遊必有方

方法也

吾語子遊惟輦上貴人裁冠

博帶堂中公子肥馬輕裘十日交驪千金解贈主旣逢
迎客亦留非然者恐閉門不納懷刺誰投况君白髮
盈頭便鼓瑟吹簫枉自羞奈彈鋏而歌食終不飽執鞭
以御富也難求尊鱸秋風一官久棄肯向侯門走馬牛
君休矣聽數聲欸乃雪夜歸舟

我學淵明歸去來今請絕交遊有草閣三間久盟息壤
秫田十畝將老菟裘山水鄉鄰梅花妻妾小部聲音黃
栗留出門去怕青天劍嘯滄海珠投而今金盡牀頭

縱舌在何辭仰面羞歎富貴才高驕人易取文章命薄
知己難求乘興而來塗窮則返笑傲隨他呼馬牛從今
後把世情看破飄瓦虛舟

題蛟門三好圖

咄咄汪生少年行樂三好兼全只飲酒離騷便稱名士
吹簫弄玉定作神仙椽燭隄廩遠山麗豎小宋風流利
可憐誰消受疑夢游蓬島醉享鈞天 回圖到處流傳
得飽看紅粧也有緣但酒癖書淫恐妨萬事歌殘舞散
難駐千年僕病停沽吾裘畏解文籍先生高枕眠君休
笑是有雖可喜無亦欣然

題五苗圖 有序

梁王立大司農夢仙人送五苗圖既得一子遂以五苗名之令方邵村補回焉而徵予詞

望氣佳哉蕉林書屋得寶隋和看畢麻家聲天邊白斗

彩鸞國色地上姮娥

母吳氏

玉燕投懷石麟露角更勝珠

哥與戶哥

司農二子小名

徵蘭夢記五苗絲緯王葉金柯不

惟孔釋摩訶有后稷攜來瓜瓞歌筭學士文章原名陶
穀將軍勲業也號田禾左握干戈右持俎豆何似掌封
萬石多詢占者是翁官農父見取高科

司農招飲攜五苗出揖客復次前調奉贈

今日華筵珠簾深處喚出苗哥看頭角硤硤宛然玉粒
雙眸炯炯秀似瓊禾花帽荷衣深躬淺喏年少偏生禮
數多問其歲是卯君誕降月胤婆娑 豈惟字識之無
便好應朝廷童子科筭唐室校書八齡劉晏秦家相國
十三甘羅第五之名何如第九笑問先生喜若何先生
笑謂諸君醉矣爲我高歌

司農行九苗哥五也

題孫赤厓攜孫小像

萬里歸來管寧無恙吾谷閒行但覓取虎頭傳神阿堵
攜將麟角繞膝如馨君善秦聲婦能鼓瑟畫裏家山聊
遣情和爾汝惟日沽一斗笑看三星

三孫小名德星
福星景星

十年

遼海飄零曾短布驅車鐵嶺城記漢殿凌雲馬卿獻賦
梁園雨雪枚臬談經聞闔天高巫陽夢遠僕亦悲歌淚
滿纓空凝望歎王孫桂樹芳草青青
大駕東巡孫子猷詩稱善今在鎮國公幕嘗詢鄙人猥蒙獎歎故感及之

贈董舜民

誰踞詞壇天下健者獨有董公會北上燕臺東游越嶠
南尋隋苑西問秦宮慷慨悲歌滑稽笑罵左把刀鉤右
酒鍾揮毫罷令雪兒起舞唱徹迴風君才十倍吳蒙
更林下夫人興致同看綠綺低彈風吹髣髴影青蛾淡掃
月上睂峰放棹探梅擁爐煨芋樂事相於閨閣中還索

取將紅橋錦字好配林鴻

李渭清贈龍鬚一莖賦此酬之

爲問何年龍戰山東墮此長鬚曾階於尺木能興雲雨
貯之勺水便化江湖今也卷然手攜在篋猶見虬髯氣
色殊還恨未向九仙館裏捋取羊珠 顧君贈我何如
好準備尊前牙杖需弄鰕鬚雖細可編簾箔魚鬚甚壯
亦樹旌旗差勝衰翁白髭似戟不中盧仝喚作奴却自
笑看吟成五字剩數莖無

摸魚兒

春怨

問東君賺春何意春來文見春去滿園花事剛三五都
付斷腸風雨花尚爾又況是紅顏薄命愁眉嫵美人日
暮便紅豆歌成翠盤舞罷難買君王顧 看千古總是
風流易誤姊歸空築青墓梅妃休怨樓東賦弔取馬嵬
黃土君莫訴君不見英雄失 還悲苦楚歌楚舞試去
聽琵琶青衫紅袖雙淚幾行數

咏蓴

問江姝寶釵半股又繞青絲一縷洞庭漁父扁舟遠摘
盡吳頭楚尾誰得似似放誕文君柔滑如脂體佳人水
泚筭不比浮萍波漂露宿何事名千里 東曹掾爲爾

挂冠歸去西風昨夜還起愁予老繫京華夢正恐欲歸
無計歸也未便一棹家鄉偕隱無人矣春前尚記想素
手調羹和鹽伴政飽識厨娘味

咏窩絲糖和其年韻

糖出大內遺製今西山一
老中監尚能爲之

問誰家吹簫深處錦絲裊就連理十分崖蜜三分脆更
勝棗兒堪嗜長安市喜今夕同探官繭燈檠底君須嘗
此是元日膏餇都城風俗賣取膠牙齒還停箸忽憶
西京雜記姪娥別樣新製白頭宮監傳遺樣曾識開元
妃子形雖似空夜雨昭陽不見紅塵荔開卿何事但腸
斷東風灞橋楊柳愁看游絲細

賀新郎

塞上

天末盧龍道看敷分山崖聳時河流低遠極望長城煙
一抹但見黃榆白草又添得孤鴻縹緲寒月如霜沙似
雪想當年有客傷心早重画出邊愁稿短衣自倚高
樓嘯弔西風一盃殘酒淚痕多少漫說明妃出塞苦不
見玉關人老更減盡英雄懷抱剩有琵琶渾不似倩盧
兒彈出涼州調公莫舞烏啼了

昭君令工造琵琶笑日
渾不似今詭爲胡撥四

賀荔裳納姬舉子

朱玉高唐賦更相逢洛川繡枕袁家新婦姓碧杜紅蘭

香不已間以明珠翠羽正解珮吳宮春暮蝶粉蜂黃都
褪了看雕梁燕燕交乳衣帶緩低睂嫵夢中神女
親攜付寧馨見天上石麟人間繡虎纔聽啼聲知大物
豪氣畧如其父請脫帽爲公狂舞玉果金錢湯餅會愧
無功厚賚吾能與只愁寫弄璋句

旅思

歲月能如許問愁人更經消得幾番羈旅白髮悲秋燈
下啄生受紙窗風雨更添得數聲砧杵敲破客心千寸
碎枉教人夢斷江南浦雁叫也又平楚澆愁惟酒差
堪語忽傷心此身飲罷茫無歸處空自珠簾難回燭看

盡清歌妙舞但應取青衫淚苦紅袖殷勤休勸醉奈
絲禪榻閒睂嬾老去也訴漁鼓

端午和劉潛甫韻

小滿吳蠶吐乍陰晴春紅消以黃梅迎暑刮眼風塵紛
未了遍地蒲人艾虎何處覓龍舟競渡橫笛短簫江上
遠但關山烽火傳鼙鼓請拔劍爲君舞 花花世界遠
如許算英雄百年成敗一盃殘醕金紫貂蟬長在否不
抵枕中炊黍又看盡蠻爭觸怒讀破離騷還痛飲歎吳
儂更比湘纍苦只一醉忘今古

九日感舊

偶過慈仁寺看門前五株松樹婆娑盡矣二十年來風景異不謂樹猶如此感舊事攀條流涕白髮青衫驅欵段笑無端貰酒荆高市聽擊筑悲風起 又逢佳節黃花裏悵登高西山殘照暮雲千里極望齊州煙九點家在吳頭楚尾添幾幅荒丘廢壘漢寢唐宮何處問祇怕酒不斷渾河水買一棹吾歸耳

立秋夜雨

又是秋來矣乍回頭悠悠長日去如流水不覺西風吹老至華髮星星添幾思往事潸然出涕我自多愁淚洗面問天公何苦愁如此下一夜霖鈴雨 聲聲滴到悲

秋耳助淒涼三年客舍故鄉千里白首馮郎休說恨尙
對孺人稚子恨莫恨別離生死不信愁人愁不寐但愁
鬼繚繞殘燈裏聽漏點三更起

七夕和韻

七七佳期矣看迢迢明河清淺盈盈一水別去一年來
一度畢竟歡娛能幾想牛女相逢流涕天上人間都不
異但有情未免誰遣此酒淚也今宵雨

七夕雨日酒淚

如儂只

是鰥夫耳望家鄉邈如天漢暮雲千里三載斷腸聞夢
香添得玉樓思子哭長史終當情死苦憶少年瓜果會
向涼階私語星光裏喚不醒姮娥起

中元再和

問夜如何淡早鷄鳴長安門外車如流水空羨朝班仙
仗好老我悶懷有幾端不爲洛陽流涕聞道地官初放
赦想覓今游戲應來此又遇着廉纖雨歸來惟有高
眠耳君莫問吹笙擊磬南鄰北里欲向蘭盆禮古佛借
我消憂幢子更解脫無常生死同病最憐陽羨客和哀
絃彈淚烏絲裏歌一曲秋風起

其年三和原韻故及之

中秋再和

作客三年矣到中秋天門街上月明如水爲問古時月
尚在照過今人有幾幾歡笑幾人泣涕明月原無缺

恨只人間離合悲如此一霎變風和雨
我今爲月徘徊
念家山亂雲遮斷美人千里待挹酒漿傾北斗吞
盡兔兒桂子更莫管明生魄死但得嫦娥相顧盼放白
頭醉舞霓裳裏聽水調歌頭起

九日再和

四見重陽矣悵悲秋他鄉何處登山臨水爲問諸公高
宴會遍插茱萸有幾何必學牛山掩涕我憶楞伽湖畔
路是少年行樂嘗過此吟一句滿城雨
追尋昨夢依然耳驚回頭歌臺舞榭半成蒿里戲馬龍山今在否爭
甚英雄豈子誰保得古而無死但起清秋風日美酹黃

花側帽斜陽裏怕轉盼寒沙起

十二時

觀獵

望平原連天野燒獵獵風吹千騎縛袴褶雕弓韝臂盤
盡山頭谷尾犬走鷹飛猿啼雁叫酒血成紅雨到日暮
疊鼓鳴笳酌酒烹鮮再殺一回足矣 記少日盧龍塞
上蠻府參軍無事戲逐孤兒短衣疋馬射虎南山裏載
黃獐滿車歸從妻子誇示 歎殘年撫髀生肉鬱鬱誰
能堪此索米金門攤書玉局見獵空歡喜問先生誰伴
嗟乎子虛亡是

蘭陵王

傷春

江南陌上東風弄色垂楊畔
寶馬香車芳草王孫自
相索美人雲髻側夢破殘紅半碧
尋春去鶯送燕迎十
二欄杆夜猶立
繁華等陳迹但雨澁莓苔風動葵麥
游絲漠漠和愁織
試目極千里斷煙寒食鄰鷄野哭如
昨日落花淚盈尺
追憶恨何及問老去東君爭似
昔客天荒地遠無人識
筭往事祇付數聲漁笛
今宵沉醉舞短劒歌昔昔

多麗

夏景

回梁間日長午夢初殘倚薰風暈紅如醉無言情思闌
珊捲桃笙尋墜珥掩金詞斜撲輕紈茉莉茶甘鷓鴣
香細儘堪消暑小屏山無心理鈿箏瑤管棋局也慵彈
閒排遣白敲水脆紅點梅酸侍兒報花梢月上清光
怯射越羅單浴蘭湯微揩粉汗插犀梳亂挽雲鬟院落
沉沉夜涼似水簫郎頻喚展琅玕還一笑背人行去等
待向更闌却尋到薔薇架下獨凭欄杆

六州歌頭

有客勸予出山者書此答之

客何爲者勸我曳長裾人所愛熱官耳顧愁予不相如
君見居官者苦思慮勞筋骨工笑語勤奔走乃多譽

我則異於是矣體多病藥物長須慣科頭晏起懶向府
中趨禮法全疎古之愚兼長捫蝨喜曝背時強頭懶撚
鬚諸若此皆不可一朝居愛吾廬種豆南山下幾個竹
吹芙蓉 鰻山犢彈野雀釣江魚况有老妻釀酒在醉
後拊缶歌呼有山公啓事綴以絕交書客且歸歟

百末詞餘 卷六

長凋尤 伺

醉扶歸 秋閨

悄金風微颺青鸞扇淡湘簾低穿白玉錢銀牀絡緯織
秋紈是蕭蕭一曲迴文怨待去西窗閒步倚欄杆不道
弓彎蹴損梧桐片

皂羅袍

遠見銀河清淺漸南星明滅北斗闌干銷覓衰柳數聲
蟬傷心蘆葉千行雁碧雲微淡蒼煙暮寒海棠腸斷蓮
花粉殘又誰家吹出瓊簫管

江見水

瘦褪芙蓉釧愁粘翡翠鈿看星星露滴花心顫聽淒淒
砧響林梢慢怎清清人立閒堦晚纖手輕支皓腕低喚
雙鬟拂拭桃笙小簟

玉交枝

燈花懶懶照香衾鴛鴦影單画屏六幅巫雲斷小睂峰
築了望夫山刀頭看殘明月環枕邊啼破幽蘭眼盼征
人秦關楚關訴離情長絃短絃

川撥棹

深深院裊香絲燭淚乾驚簷前鐵馬珊珊驚簷前鐵馬

珊珊錯認是蕭郎夜還歎長宵度一年問長安隔一天
饒饒令

夢裏不怕險飛過大江邊又被茅店鷄聲重呼轉依舊
對空房獨自眠

尾聲

幾時勾却相思傳寄書郵落沉魚雁更把歸期託杜鵑
南呂宜春引

贈馮靜容校書

宜春呼蘇小問薛濤總無如馮娘最嬌鶻伶淥老秋波
一轉天然妙正連螭蟬髻低垂恰宛轉蛾眉淡掃

太師引

觀脂肉芙蓉暈潮更一笑嫣然別樣丰標

針線窗

針線箱淡黃衣阿嬌初着香羅帶紅兒細裊蕩湘裙微露

金蓮小占盡美人圖稿彈絲譜就文君操品竹吟成羸

女簫

瑣窗寒

渡頭歌扇逐雲飄香生樊素櫻桃

奈子樂

奈子花

舞霓裳飛動雲翹唱迴風斜掠弓腰燭花影裏驚

鴻繞重翻出教坊新套

大勝樂

翠盤散了還愛伊持觴勸

酒溫存傾倒

秋夜令

秋夜月

才致豪彤管描香草字學夫人簪花巧詞填幼婦

題紅好

東甌令

分明錦繖女嫖姚俠氣傲兒曹

浣溪蓮

浣溪

締素交憐同調奈尋春惆悵花朝江妃玉珮雖空

抱司馬琴心敢漫挑儂懊惱

金蓮子

獨倚着朱牆東望行

雲十二楚峰高

尾聲

除非圖作真真叫玉山頭小玉住非遙夜熱名香夢可招

北一半兒

佳人

佳人好似董妖嬈約得郎來故作喬戲與藏鈎賭那宵

試推敲一半兒蓮仁一半兒棗

又 閨情

翠蛾斜斂倚窗紗爲憶狂夫在那家私對小鬟閒嗑牙
却防他一半兒叨叨一半兒啞

又 旅思二首

清和天氣曉寒餘客夢紅午賦索居風動瑣窗綠滿除
漫攤書一半兒斜陽一半兒雨

江城蕭瑟似孤村長日如年深閉門消遣客愁空酒樽
奈何人一半兒闌行一半兒睡

駐雲飛

閨情

暈臉堆霞碧玉芳年初破瓜半點春山画一轉秋波射
佳裙帶襯單紗晚粧偷卸低喚郎來攜手珠簾下笑看
窗前夜合花

黃鸝兒

美人乳

寶袜纏紅羅紫葡萄白露和軟紅新剝鵝頭顰膏凝玉
波香吹粉荷蘭湯浴罷花心嬋襯金訶繡衾低臥未許
阮郎摩

又 美人足

素足裹紅靴印芳塵玉一梭弓彎斜疊蓮花朵艷鮓踏
歌鞦韆笑拖伴郎春夜鴛鴦臥解凌波巫山雨過怕濕

襪兒羅

又美人醋

新釀醋葫蘆剪金屏仕女圖夢中不許高唐賦嗔青溪
小姑罵黃鬚老奴津頭波浪公無渡笑見夫窮酸措大
風味略如吾

又戲懼內者

何事犯娘行跪粧臺一炷香風流罪過難輕放笞之太
強殺之過傷叅詳惟有官刑當好關防如何黑夜越獄
上牙牀

針線箱

夜思二首

剛聽了暮蟬啼住又早是寒蛩喚起做秋聲把客耳生
驚碎人在西風夢裏孤窗小病三更雨千里相思午夜
鷄心如死剔殘缸愁照覓影支離

大都是病魔愁祟又添得風頭雨尾寸心見薄似西窗
紙却被芭蕉敲碎回身掩淚挑燈立對影離覓望月飛
如何睡枕頭見山重橫壓愁低

羅江怨

旅思

帶香羅鄉關道路遙思歸夢勞相思寫盡題倦標怕聽鄰
院夜吹簫也又銅壺暗滴疎鐘亂敲紗窗月影和悶搖
一江風偷掩鮫綃莫向孤幃照秋鴻嘆幾宵春鶯喚幾朝

都說道江南好

又 閨思

春風折柳條才郎去遙榴裙淚滴紅暈潮歸時依樣驗
羅袍也問寒衾幾點孤燈那宵刀頭盼斷香更燒望到
吳舫對鏡花含笑芙蓉粉再調鴛鴦枕再描細聽說長
安道

五色絲 滿粧美人

白練序 遠山如画半額宮鵝兩髻鵝愛塞外胭脂新粧偷

寫

黃鸝見

黃貂套斜白狐罩遮

青哥見

羔兒三寸小烏韉妖

嬌俊煞

紅荷藥

侍亂點酥駝醉花下蕩紅裙紫騮驕馬

黑瘡

序
不爭差便似昭君出塞只少琵琶

新樣四時花 題美人圖

小桃 紅 剛拭了鴛鴦硯漫閣着珊瑚管月上海棠正曉粧初罷

倦倚庭軒紅芍藥見歷亂杏雨梨煙聽宛轉燕管鶯絃石榴

花 觸芳心喜將春色傳細拈出翠輕紅軟水紅花稿纔完

呼郎同展玉芙蓉盈盈蝶粉粘紈扇冉冉花鬢落錦箋梅花

塘 綢繆私印側把楷字小名填看還憐水仙子錯認紅粧

活現画中人依稀眼前

又 賀毛大可納姬

剛賃了合婚店早築就移春檻看傳言玉女飛下珠簾

新買贈翠羽瑤簪恰裁成石竹羅衫問名兒比紅紅更
愁小毛公花房獨探倚香奩常陪書劍羅敷趙瑟儂家
占子夜吳歌近日諳鴛鴦枕簟且喜芳草帶宜男同夢
酣但願郎君放膽那怕夫人令嚴

駐雲飛

十空曲

昔蓮池大師作七筆勾予竊慕焉旅次無聊擬爲十
空曲既以自警并勸世人

一國三公車馬長安殿閣中鼎爵分班奉金印輪流弄
紫白首戀鳴鐘青山木拱華表路旌斷送黃梁夢君看
蓋世功名總是空

萬貫千鍾篋靈青蚨倉朽紅合藥燒丹汞掘土埋銀甕
嗟金穴與陵銅化成泥塚雖有錢神難買南柯夢君看
敵國貲財總是空

北苑南宮萬戶千門擬九重金屋阿房銜金谷天台洞
嗟臺榭土花封牛羊丘隴綺閣迷樓也等華胥夢君看
甲第田園總是空

翠翠紅紅十二金釵列小童綺席雲鬟擁錦帳花心動
嗟脂粉髑髏工狐精賣弄雨散雲收想斷巫山夢君看
絕世紅顏總是空

絃索丁冬絳蠟燒殘曲未終鼓疊江南弄簫吹秦樓鳳

嗟轉盼白楊風挽歌相送子弟梨園同入鈞天夢君看
大地音聲總是空

魚穴駝峰下箸千錢未足供美酒金尊送肥肉臺盤捧
嗟殺氣滿唉隴請公入瘴逐鹿烹庖變作芭蕉夢君看
飲食因緣總是空

青母黃公嫁女婚男風俗通交頸紅衾共繞膝烏衣從
嗟分手各西東主人翁仲打散鴛鴦驚斷熊羆夢君看
眷屬團圓總是空

繡虎雕龍彩筆吟成萬卷工獻賦長楊重問字立亭聚
嗟何處哭秋風淒涼文塚一部南華不過莊周夢君看

錦繡文章總是空

暨子英雄觸閭蠻爭蝸角中一飯丘山重睚眦刀兵痛
嗟世路石尤風移山何用飄瓦虛舟不礙松風夢君看
爾我恩讐總是空

擾擾匆匆遮莫晨鷄與暮鐘梵筵無須嗔公案何勞頌
嗟早覓主人公風旛不動放下機關圓破蒲團夢君看
萬法無常總是空

北耍孩兒

和高侍郎席上作二首

漫乾坤百丈塵趨春秋萬斛愁黃鸝白日寧長久俺只
見鴛鴦樓上飛蝴蝶虎豹關前走馬牛猛思量空消受

搬故事黃梁夢裏弄前程傀儡塲頭

歎浮生燈上花看人情浪裏舟朝歌暮哭同何有須知
道雲翻雨覆難開口水盡山窮急轉頭早參來三分透
慢鑽求牧羊想馬休錯認騎馬尋牛

高邑趙儕鶴家宰一代正人也予于梁宗伯處見其
所填歌曲乃雜取村謠里諺耍弄打諢以洩其骯髒
不平之氣近則高念東侍郎亦復爲之至李昌祺生
平剛嚴方直以續剪燈餘話不得祭於社面黃才伯
笑擁如花之句自注爲欲盡理還王元美云此公作
美官講學恐人得而持之故也若然則文王琴瑟鐘

鼓幾爲梨園作俑而夫子善與人歌不且稱曲子先生耶予少而嬉戲中年落鳧無聊好作詩餘及南北院本雜曲綺麗疊陳詠諧間出知我者以爲空中語罪我者以爲有傷名教不祇白璧微瑕而已聊存一二以志過焉昔有先輩規湯若士講學者湯曰吾與公日講學而人不知也公講性某講情或謂王漢陂太上立德其次立功其次立言漢陂笑曰豈不聞其次致曲乎二君之言雖戲亦足以解嘲矣悔菴自跋